



Akaun Fleksibel Kwsp Bantu Penuhi Keperluan Kecemasan Pencarum - Pakar

⌚ 25/04/2024 06:38 PM



KUALA LUMPUR, 25 April (Bernama) -- Pengenalan Akaun Fleksibel Kumpulan Wang Simpanan Pekerja (KWSP) merupakan satu daripada alternatif institusi itu untuk memenuhi keperluan dan dana kecemasan pencarum dalam mendepani cabaran menjalani kehidupan sebelum bersara.

Ketua Ekonomi dan Kewangan Sosial Bank Muamalat Malaysia Berhad Mohd Afzanizam Abdul Rashid berkata KWSP merencanakan suatu agihan tepat dengan mengambil kira Akaun 1 atau Akaun Persaraan (AP) masih lagi mewakili kadar terbesar dalam hierarki akaun ahlinya.

"Ini bererti lebih daripada dua per tiga simpanan KWSP di dalam Akaun 3 akan memberi banyak ruang kepada pencarum untuk menggunakan simpanan mereka bagi apa-apa tujuan atau kecemasan," katanya kepada Bernama hari ini.

KWSP hari ini mengumumkan inisiatif Penstrukturkan Semula Akaun KWSP berkuat kuasa 11 Mei dengan memperkenalkan Akaun Fleksibel bagi keperluan kewangan jangka pendek.

KWSP dalam kenyataan memaklumkan inisiatif itu bertujuan menambah baik keselamatan pendapatan persaraan di samping memenuhi keperluan kitaran hidup ahli apabila bermula tarikh tersebut semua akaun ahli di bawah umur 55 tahun akan distruktur semula daripada dua akaun sebelum ini iaitu Akaun 1 dan Akaun 2 kepada tiga akaun.

Mohd Afzanizam menasihatkan kepada pencarum KWSP untuk melakukan perancangan teliti sebelum membuat keputusan untuk pengeluaran dengan mengambil kira faktor pengganda dalam simpanan mereka.

"Ini adalah kerana apabila mereka mengeluarkan wang tersebut, ahli akan kehilangan faktor pengganda atau *compounding factor* dalam simpanan mereka di KWSP. KWSP dilihat sentiasa mengumumkan kadar dividen yang kompetitif dan *compounding factor* ini akan mempercepatkan pertumbuhan simpanan pencarum sekiranya mereka kekal menyimpan di institusi tersebut," katanya.

Selain itu, Pensyarah Fakulti Perniagaan, Ekonomi dan Pembangunan Sosial Universiti Malaysia Terengganu Prof Madya Dr Roshaiza Taha berkata pelaksanaan Akaun 3 tersebut turut menguntungkan golongan M40 dan T20.

"Kita tahu sebahagian pendapatan golongan M40 dan T20 lebih tinggi. Sebagai contoh, dia punya pendapatan adalah RM10,000 dan dia punya caruman KWSP sebanyak 11 peratus, bersamaan RM1,100 dan berkemungkinan dia ada RM165 (di dalam Akaun 3). Bagi golongan B40 nilai akan jadi lebih rendah sekitar RM70 atau RM30," katanya.

Menurutnya, jika mereka yang berada dalam golongan B40 tidak cakna kewangan, berkemungkinan akan berdepan masalah pada tabung persaraan masa akan datang.

"Kerajaan perlu memainkan peranan untuk mendidik pencarum dalam menyalurkan sebahagian kecil pendapatan mereka kepada *liquid investment* (pelaburan mudah cair) kerana mereka masih lagi perlu dilindungi pada masa hadapan.

"Melihat keadaan semasa, saya tahu bahawa keupayaan rakyat Malaysia untuk meneruskan kelangsungan hidup sangat susah sehingga ada yang mengikat perut untuk makan. Akan tetapi, pencarum tetap perlu cakna mengenai keperluan dan kehendak mereka," katanya.

Sementara itu, Puteri Amila Amdan, 30, akauntan di sebuah syarikat perkapalan berkata kewujudan Akaun 3 oleh KWSP itu bukan satu keperluan buatnya kerana dia masih berpegang bahawa simpanan di institusi tersebut adalah untuk kegunaan ketika hari tua.

"Saya berpendapat sekiranya terdapat sebarang kecemasan dan masih boleh diusahakan tanpa keluarkan duit daripada KWSP, itu adalah lebih baik kerana semua maklum wang KWSP merupakan simpanan hari tua. Kita pun tidak tahu masih boleh bekerja atau tidak pada waktu itu nanti," katanya.

Muhd Aidil Imran Nasri, 26, berkata langkah dilaksanakan oleh KWSP itu sangat membantu pencarum yang berhadapan dengan kecemasan kerana wabak pandemik COVID-19 yang melanda negara pada 2020 mengakibatkan rakyat hilang pekerjaan dan berhadapan dengan masalah kewangan.

-- BERNAMA